

যা রে কাগজের নৌকো

সুভাষ মুখোপাধ্যায়

দৃশ্যত

রাস্তা দিয়ে যেই যায়, খোলা জানলা, উঁকি মেরে দেখে—
কে একজন সারাক্ষণ গদি-আঁটা কাঠের চেয়ারে
টেবিলে দু-ঠ্যাং তুলে গালে হাত দিয়ে ব'সে থাকে।

চুলগুলো খোঁচা খোঁচা, ভাঙা গাল, দেখতেও চোয়াড়ে,
মাঝখানে সামান্য ভুঁড়ি, যে রকম হয় ভারী ট্যাকে—
বেড়া ভেঙে ভাবনা ঢুকলে সম্ভবত দেয় সে খোঁয়াড়ে।

চোখে যদি চশমা থাকত, হাতে যদি ধরা থাকত বই
কিছুটা আন্দাজ করা যেত হয়তো লোকটার স্বভাব
বাইরে থেকে কে কী বুঝবে? কার সাধ্য পাবে তার থই?

গড়গড়ার নল হাতে থাকলে তবু দেখাত নবাব
পাছে ধরা প'ড়ে যায়, রাখে না সে কোথাও টিপসই
তবে কি নিজের সঙ্গে চলে তার সওয়াল জবাব?
সে খোঁজ রাখে না কেউ, লোকচক্ষে সে শুধু দৃশ্যই॥

BANGLADARSHAN.COM

জলে পড়া

এক হাঁটু জলে ছপাৎ ছপাৎ ক'রে লোকটা হাঁটছে
আর ভাবছে,
রাস্তায় জল দাঁড়াবে
এমন তো কথা ছিল না।

জল দাঁড়ালে
ভেতরের আরও অনেক কিছু চাপা পড়ে
এটা ওর খেয়াল ছিল না।

হঠাৎ এক অদৃশ্য গর্তে পরক্ষণেই
ওর বোঝার ভুল
আর পায়ের হাড়
একই সঙ্গে ভেঙে গেল।

আর ফুটপাতে ব'সে পড়ায়
ওর হাঁটুর জল
তৎক্ষণাৎ গলায় উঠে এল॥

BANGLADARSHAN.COM

আওনি বাওনি চাওনি

কাল গিয়েছে শিবের গাজন
আজকে হালখাতা
মহাজনের গদিতে কান—
ফোঁড়ানো শালপাতা।

দেয়ালে আঁকা বসুধারা
দুয়োরে আল্পনা
লক্ষ্মীর পা মাড়ায় কেটা
হ্যাদে, মোড়ল-পো না?

পোড়াকপালের বছর গেছে
কেটে
কখনও খরায় মাঠ গিয়েছে

ফেটে
কখনও বান নিয়েছে ধান
চেটে

ঘরের মানুষ ভুঁয়েতে শুয়ে
জ্বর গায়
আগ পড়েনি আখায়
আল্গা মুঠোয় ছটাক জমি
বর্গায়

হা রে রে রে রে
বর্গীর দল ফেরে

পা ধোয়ার জল তুলে রেখেছি গাডুতে
মিটবে ওদের ক্ষিধে বিষের নাডুতে

আওনি বাওনি চাওনি
দিনবদলের পালা এল
কালবোশেখির ঝড়ে

BANGLADARSHAN.COM

পুরনো ভিত নড়ে
আগনের এই হল্কায়ে তার
আঁচ এখনও পাওনি?

BANGLADARSHAN.COM

যা রে কাগজের নৌকো

বদর বদর ব'লে, ও ভাই
নোঙর নিই তুলে
যা রে কাগজের নৌকো
হাওয়ায় হেলে দুলে

ক্ষীরনদীর কূলে নয়
কলুটোলার বাগে
ঢোলসমুদ্র রাস্তা রোখে
দমকলের আগে

মা-কালী কলকাতাওয়ালী
ঠন্ঠনের মোড়ে
জলে ডুবুক যে ঠোঁটকাটা
কলকাতাকে খোঁড়ে

বাজার বন্ধ, ট্রাম-বাস বন্ধ
পরোয়া নেই কিছুরই
এই বাদ্লায় জমবে ভালো
মুসুরডালের খিচুড়ি

যা রে কাগজের নৌকো

সর্বনাশী এলোকেশী
চিলেকোঠার মাথায়
আলটাকরায় শব্দ ক'রে
বিষম ভয় দেখায়

মেঘের গায়ে গা ঢেকে
কোন্ গুণিন্, হা রে
আঙুল মট্‌কায় চোখ মচ্‌কে

জল পড়ে আর
থেকে থেকে

BANGLADARSHAN.COM

বান মারে

যা রে কাগজের নৌকো

টেলিগ্রাফের তারে ঝোলে

ছেঁড়া ঘুড়ি

হাঁটুজলে পা ডুবিয়ে

গাছের গুঁড়ি

আজ বাদে কাল

বিশ্বকর্মা

বৈঠকখানায়

পৌঁছোয় ফর্মা

দালানকোঠা

বন্ধ ঝাঁপ

জলছবিতে

উল্টো ছাপ

কাগের ঠ্যাং আর

বগের ঠ্যাং

লিখে দিয়েছি—

ড্যাডাং ড্যাং

যা রে কাগজের নৌকো

২

টাপুর টুপুর টাপুর টুপুর

বাজছে কারও পায়ের নূপুর

ও আমার বোন মেঘরাণী

হাত-পা ধুয়ে ফেলায় পানি

কলের সিঁড়ি চ'ড়ে

তাকে আন্ আদর ক'রে

যা রে কাগজের নৌকো

পড়ে না কিছু মনে—

সেই যে কবে ঢেউয়ের দোলায়

সাগরমহুনে

জলের বুকে জন্মেছিল

জীবন স্পন্দমান

বহুযুগের ওপার থেকে আষাঢ় এল নেমে

আজও কি তাই ঋতুমতীর

তরঙ্গময় অঙ্গে

চন্দ্রকলার

অমোঘ সেই টান?

ও আমার চাঁদের আলো

মনে পড়ে না, মনে পড়ে না

মনে পড়ে না কিছু

যতই কেন ছুটে বেড়াই

হারানো সব দিনের পিছু পিছু

যখন আমি জন্ম নেব ব'লে

জল ভাঙছি, জল ভাঙছি,

জল ভাঙছি, জল

মা নিদারণ ব্যথায় তখন

ক্লিষ্ট

মনে পড়ে না কেমন ক'রে

ল্যাজ খসিয়ে

হেঁটমুণ্ডে

হয়েছিলাম কী কুস্বরে

এই আমি ভূমিষ্ঠ

গভীর কোন্ অন্ধকার হয়েছ তুমি পার

বনগাঁবাসী মাসিপিসি
আজ ষেটেরা
থুৎকুড়ি দাও ছেলের বুক
নজর না দেয় হিংসুটেরা

মাটির দোয়াত
খাগের কলম
বুড়ো বিধাতা
চোখে দেখে কম

আড়াল ক'রে সবাই দাঁড়ায় কাছাকাছি

মেঘ করছে গুড়গুড়
আকাশ বেজায় কালো
আটকৌড়ে বাটকৌড়ে
ছেলে আছে ভালো?

বৃষ্টি পড়ে বামাবাম
টেকিতে কোটে চিড়ে
দমাদম পেটাতে পেটাতে
কুলো গেছে ছিঁড়ে

তিলের নাড়ু ফুরিয়ে গেছে
বাতাসা তাও এই টুকু
বলি
খোকা, না খুকু

ঘুঘুসইয়ের দিন গিয়েছে
হাঁটি হাঁটি পা পা
দেয়াল ছেড়ে চৌকি থেকে
মেঝের ওপর লাফা

যাস্ নে গো তোরা যাস্নে ঘরের বাহিরে

ঝড় উঠল অগ্নিকোণে

BANGLADARSHAN.COM

ঝড় উঠল ঝড়
কচুর পাতায় নুন এনেছি
একটি আম পড়

অম্বুবাচী গেলে বাঁচি
হচ্ছে বৃষ্টি ছাড়ছে না
ফসল এ সন ভালো হবে
শোধ হবে সব ধারদেনা

উনুনে মোট আঁচ পড়েনি
হবে না আজ আন্না
ভিজে গায়ে মাটি-মায়ের
ফুঁপিয়ে ফুঁপিয়ে কান্না

এই শ্রাবণের বুকের ভিতর আগুন আছে

8

BANGLADARSHAN.COM

বৃষ্টি পড়ছে? তবে তো এক্ষনি—

যেতে হবে রথের মেলায়।

যাবি তুই?

সঙ্গে গেলে তোকে দেব রথের পার্বনি।

হেঁটে যাব। রাজি?

নদী থাকলে, নৌকৌ থাকলে হত ভালো

তবে কি জানিস?

বন্ধস্রোত

নদীতে এখন শুধু ঝাঁঝি।

আমি যাব খালি পায়ে, তুই জুতো পরে,

কারণ তো জানিস—

জীবাণুরা ওৎ পেতে থাকে এ শহরে।

গঞ্জরের চামড়া গায়ে আছে

আমার হয় না কিছু

পেরেকে বা কাঁচে।

পাওয়া গেলে কিনে দেব তালপাতার ভেঁপু-
যাবি দাদু, যাবি?

চোখে ছানি, শুনি কম
একটা কান একেবারে কালা

নেই দম

ফোলানো বেলুন কিনি, নিজে আমি দিতে পারি নে ফুঁ।

তালপাতার ভেঁপু পেলে

আমার কানের কাছে মুখ এনে রাস্তায় দাঁড়িয়ে

খুব জোরে একবার বাজাবি?

বৃষ্টি পড়ছে? তবে তো এফনি

যেতে হয় রথের মেলায়।

আমি যাচ্ছি। তুই যাবি?

ভিজলে কারও হয় কিছু? ছাই হয়।

মা-বাবারা বলতে হয় বলে-

তাও শুধু নিজের ছেলেকে।

ভয় দেখায়, ভয়।

একটু শুধু মর্চে-পড়া, তা নয়ত-

দ্যাখ্ দাদু

আমার এ লোহার শরীর।

আমি জানি জাদু,

রোদ জল শীত গ্রীষ্ম সবই

আমার স্ববশ।

মা কেমন ছিল তোর জানি না ছোটোতে

যেরকম বকে তোকে সারা বেলা

মনে হয়,

বড্ডই মুখরা।

তবে তোর বাবাকে তো জানি-

ফেলে রেখে পরীক্ষার পড়া

খালি খেলা, খালি খেলা, সারাক্ষণ খেলা।

সেই তোর ডানপিটে দস্যি বাবা বড় হয়ে
আপিসে যাবার আগে রোজ
তাকে কিনা বলে—
খবদাঁর, বেরোবে না জলে।

বড় হয়ে লোকে এত ভুলে যায়
নিজেদের ছেলেবেলাটাকে—
মাথাভর্তি টাকে হাত দিয়ে
ঢাকে, শুধু ঢাকে।

রথের মেলায় আমরা যাব ভিজে ভিজে
মজা হবে কী যে!
যখন ছিলাম আমি ঠিক তোর মতো
যতই ঝড়বৃষ্টি হোক
খেলা থাকলে বেরোতেই হত।

সারাটা দুপুর কাটত ছিপ হাতে বিলে।
ভিজে জামা, ভিজে জুতো
রোদ উঠলে গায়েই শুকুতো।
ছুটিটা মজায় কাটত ঠাকুর্দার কাছে
দেশের বাড়িতে।

বাবা লিখত: এ ক'রে।—না, সে ক'রে-না খালি।
ডুববে, সাপে কাটবে কিংবা করবে অসুখ-বিসুখ—
সব সময়
ভয়।

অন্ধকারে তুমি যদি দেখবে জোনাকি
হাতে কেউ লণ্ঠন নেয় নাকি?
ঝুঁকে পড়ে হাঁদারার জলে
দেখা যাবে কাকে?
কথা ব'লে জানবে না একবার
সে সেখানে থাকে?
নষ্টচন্দ্রে ফল চুরি করাই তো রীতি।
তাই ব'লে ছিলাম না অবুঝও

চাঁদসদাগর হয়ে দিতাম বাঁ-হাতে
মনসাকে পুজো।

ইয়া!

আমার মাথায় এক, দ্যাখ দাদু,
এসেছে আইডিয়া।
মা-র জন্যে কিনলে কিছু ফলফুলের চারা
গলে জল হয়ে যাবে
দেখিস বেচারী।

আর তোর বাবার জন্যে কী যে কেনা যায়
যা শেখাবে তাই শিখবে দাঁড়ে ব'সে
এমনি এক কথা-বলা পাখি,
নাকি

গলায় বগ্লস-দেওয়া লোম-অলা কুকুর
যারা হয় প্রভুভক্ত খুব।

আমাদের সব সাজা
হয়ে যাবে

তাতেই মুকুব।

বৃষ্টি পড়ছে? তবে তো এফ্ফনি
যেতে হয় রথের মেলায়।
কি রে তুই,
যাবি?

৫

আমি রইলাম প'ড়ে

অজলে অস্থলে

মনপবনে দেখ রে

ময়ূরপঙ্খী চলে

রওনা হয়ে

কাগজের নৌকো

আর ফেরেনি

BANGLADARSHAN.COM

বাড়ি মুখো
ভেসে গিয়েছে
আমার সৃষ্টি
চোখের কোণে
নামিয়ে বৃষ্টি ॥

BANGLADARSHAN.COM

ছায়াপথ

মাঠ জুড়ে সারা বেলা
শুধু ঘুরে ঘুরে
ঠা-ঠা রোদুরে
ভেঙেছি দু-পায়
শক্ত মাটির ঢেলা

মুখচোখহীন আকাট ছায়াটা
থেকেছে সঙ্গে ঠায়

হাতে পায়ে ধ'রে বলেছি, যা তুই—
মেরেছিও লাথিঝাঁটা
তবু মুখপোড়া
গায়ে মাখনিকো কিছু

BANGLADARSHAN.COM

যতবার তাকে ক'রে দিয়ে খোঁড়া
পেছনে গিয়েছি ফেলে
মোড় ঘুরতেই
সে দেয়
সামনে নিজেকে ঠেলে

বেলা প'ড়ে এলে
মুখ দিয়ে নুড়ো জ্বলে
তুলে মাটি থেকে
ফেলে দিই তাকে জলে

জলদর্পণে ঠেকে
দেখি সে বেহায়া
ছায়া
সশরীরে মাথা তোলে॥

ডোমকানা

বাড়ি ভুল ক'রে, কাঠ-কাঠ হাতে
হাততালি দিয়ে,
ঢোলক বাজাতে বাজাতে

‘ওগো মা, ও দিদি
খোঁকা দেখা না রে,
না জানি কী লেখা
কপালে লিখেছে বিধি-’

ব'লে কড়া নাড়ে

হেঁড়ে গলা, গাল-চড়ানো ক'জন
জন্মদুঃখী হিজড়ে

হবি তো হ, থাকে সেইখানে একা
তিনকাল গিয়ে এককালে ঠেকা
এক আঁটকুঁড়ো

বুড়ো

বেঁচে থেকে শেষবারের মতন
নিজেকে সে টেনে হিঁচড়ে
এনে কোনোমতে দরজায়
দিয়েছিল তুলে হুড়কো

বাইরে জন্ম, ঘরে মৃত্যু ও জরা-
পথ ভুল ক'রে
মুখোমুখি দুই অন্ধ দুদিকে,
ডোমকানা দুই মূর্খা॥

যম-যমী সংবাদ

ও আমাকে হিংসে করত

কিছুটা বা ঘৃণা

কালের পুতুল হয়ে

আমি কিনা নিয়তি মানি না

যাতে আমি না পাই নাগালে

সমস্ত বাঞ্ছিত ফল

তুলে রেখে দিত মগডালে

দেখে যাতে ফেটে যায় বুক

দাঁড় করিয়ে আমাকে রাস্তায়

ফুটিয়ে জানলার কাঁচে সৌভাগ্যের মুখ

চকিতে সহসা

হানত দ্রুত বিদ্যুতের কশা

সে চেয়েছে বেঁধে দিতে

সমস্ত গতিবিধি

লক্ষ্মণের খড়ির গণ্ডিতে

আমি পা বাড়ালে

বরাবর কেড়েছে সে পা-রাখার জমি

দীর্ঘ পথ পার হয়ে এসে

যম আর যমী

আমি আর আমার সময়

বেলাশেষে পা ছড়িয়ে

বসে পিঠোপিঠি

আমি খেলি বাঘবন্দী

BANGLADARSHAN.COM

ছানি-কাটা চোখে মোটা পরকলা পরিয়ে
সমবয়সী প্রতিদ্বন্দ্বী
বহরের বাহান্নটা তাসে খেলে
গাধা-পিঠোপিঠি।

BANGLADARSHAN.COM

হায়েনার হাসি

পেছনে পায়ের শব্দ পেয়ে
বলেছিলাম
আমাকে বিরক্ত ক'রো না
এখন যাও

নাচতে নাচতে চ'লে গিয়েছিল

পেছন থেকে একদিন
অতর্কিতে চোখ টিপে ধরায়
হাত ছাড়িয়ে নিয়ে রুম্ফ গলায়
কলমের গোড়ায় চোখ রেখে
বলেছিলাম

আমার সময় নেই, তুমি যাও

ছুটতে ছুটতে চ'লে গিয়েছিল

এখন আমি সমস্ত কাজ সেরে
হাতে অফুরন্ত সময় নিয়ে
পা ছড়িয়ে বসে রয়েছি
একই নাম

জপের মালায় কেবলই ঘুরছে
মন প'ড়ে আছে পেছনে

সামনে গাছের পাতা থেকে

সমানে জল প'ড়ে যাচ্ছে

দেয়ালঘড়িতে অবাধ্য

টিক্-টিক্-টিক্-টিক্ শব্দ

কপালে মিন্ মিন্ করছে ঘাম

পেছনে তাকালে হয়তো দেখব

কাগজের মতো সাদা হাড় নিয়ে

BANGLADARSHAN.COM

একটা পরিতৃপ্ত হায়েনা
হাসিমুখে
বেশ রসিয়ে রসিয়ে
শব্দ ক'রে জিভ চাটছে॥

BANGLADARSHAN.COM

ফিরি

ফেরির লঞ্চ ছাড়ে

জলে এখন

টান খুব

ব'সে রয়েছি পাড়ে

এক নদীথে দুবার

দেওয়া যায় না ডুব

কানের কাছে বাজছে ভেঁ

মন বলছে যাব যাব

যাওয়ার নেই জো

এখুনি ছিল, এই এখানে, সামনেই

যেই ফেলেছি পলক

আর নেই

হাতে চাবুক, ঘোড়ায় দেওয়া জিন

তর সয় না

আমাকে ফেলে চ'লে যাচ্ছে দিন

রাত এখুনি দেবে

অন্ধকারে ঝাঁপ

সকালবেলার পাপড়িতে আর চোখের

থাকবে জলছাপ

থলির ভেতর স্মৃতি

হাতড়াচ্ছে শব্দ গন্ধ ছবি

জানি না ঠিক সত্যি না আজগবি

কারো কপালে চাঁদের টিপ

সিঁদুরে মেঘ

রাঙানো কারো সিঁথি

BANGLADARSHAN.COM

হাওয়ায় ভেসে এল হঠাৎ
বাবার মাথার চুলের
জবাকুসুমের গন্ধ

কোথায় নদী কোথায় কী
সমস্তই ভেলকি
ঘরের দরজা বন্ধ

মেঝের ওপর দাঁড়িয়ে রোদ গায়ে হলুদ দিয়ে...

BANGLADARSHAN.COM

ভয় দেখাই

যত দিন যায় রাস্তা ততই
ছোট হয়ে আসে।

এখন আমার দৌড় বলতে
বাড়ি থেকে বাজার
আর বাজার থেকে বাড়ি।

কুমড়োর ফালিগুলো
ফ্যাল ফ্যাল করে আমার দিকে তাকায়
আমার নাকি চেহারা হয়ে যাচ্ছে
পোড়া কাঠের মতন।

মাঠে জল দাঁড়িয়ে,
হাড়ে এবার দুক্বো গজাবে।

এই নাও তোমার পাখির জন্যে
মুলো শাক
বেড়ালের জন্যে মাছের কাঁটা
কুকুরের জন্যে ছাঁট।

দেখনহাসি দিয়ে চাপা দিই
ঘাড়কোমরের বাতের ব্যথা।
পাশে একজন সাজোয়ান ভদ্রলোক
ঘুরে দাঁড়িয়ে কটমট ক'রে তাকায়।
দেখতে না পেয়ে
ঠেলাগাড়ির চাকায় পা মাড়িয়ে দিয়েছি।
লজ্জায় ম'রে যেতে যেতে বলি,
মাপ করবেন।

জলের ভেতর থেকে
চোখ বড় বড় ক'রে উঁকি দেয়
গুচ্ছে গুলেবেলে।

BANGLADARSHAN.COM

মড়ার মতো প'ড়ে থাকে কই,
মাঝে মাঝে মুখ বামটা দেয় শোল।

আ মর, মিন্সে।

ঘাড় ফেরাই।

কেউ কিছু বলল আমাকে?

আলুর দোকানীর রাখটাক নেই।

ক'দিন আপনাকে দেখিনি—

আমি তো ভয় পেয়ে গিয়েছিলাম।

যে বয়েস

ভয় হয় কিনা, আপনিই বলুন?

নিশ্চয়, নিশ্চয়,

সারা জীবন কেঁচো হয়ে থেকে

এখন আমি দাপটে

সবাইকে ভয়ে তটস্থ করে রাখি॥

BANGLADARSHAN.COM

নিতে আসেনি

সেজেগুজে তৈরি হয়ে, কী যন্ত্রণা
বসে রয়েছি কখন থেকে
নিতে এল না

হাতে কোনো কাজ রাখিনি
টেবিল ধোয়ামোছা
ঘড়ির কাঁটায়
সারাক্ষণ খোঁচা

নিতে এল না
নিতে এল না

জানলা দিয়ে ঠিকরে পড়ে
সূর্যাস্তের সোনা

নেভানো বিড়ি ছাইদানিতে প'ড়ে
সুখটানের ধোঁয়ায়
গিয়েছে ঘর ভ'রে

কাঁধের ঝোলা একবার নামাই
একবার তুলি
জুতোর ফিতে
বাঁধি খুলি

নিতে এল না
বৃথাই সাজসজ্জা

ঘরের বাইরে হঠাৎ যায় শোনা
কিসের শব্দ
মুহূর্তে কান খাড়া

ও কিছু নয়

BANGLADARSHAN.COM

ব'সে রয়েছি, ব'সেই আছি
গায়ে বসছে মাছি
বোবা দরজা
দাঁড়িয়ে থাকে সময় ॥

BANGLADARSHAN.COM

যদি বলি

ভুল কি হয়

বলিই যদি

সাগর নয়—

নদী?

নয় কো নুন,

জলে কেবলি

জাগে নতুন

পলি।

নেই গলায়

কোনো ঘোষণা

ক্ষেতে ফলায়

সোনা।

সাগরময়

অন্তে যদি,

উৎসে হয়

নদী।

অগণ্যকে

সাগর বলি

লাবণ্যকে

পলি॥

BANGLADARSHAN.COM

ঘড়ির কাঁটায়

আমাদের আগাপাশতলায়
ঘড়ির কাঁটায় ছিন্নভিন্ন
এক রক্তাক্ত সময়।
পেছনে লুকিয়ে রাখা হাতে
কোলাকুলির জন্যে
মুখিয়ে আছে বাঘনখ।
কথার আড়ালে আবড়ালে
চেরা জিভে
হিস হিস করছে চোখটাটানো
হিংসে।

একটা গড়ানো বলের মধ্যে
টিক টিক করছে
সলতে জ্বালানো যে বিস্ফোরণ
তার বিষদাঁত না ভেঙে
আমার মুক্তি নেই॥

BANGLADARSHAN.COM

পাতালপ্রবেশের আগে

ফুটপাথের গায়ে লেপ্টে থেকে

ভয়ে তটস্থ

দাঁতে-দাঁত-লাগা

ঝাঁঝরিতে

যেখানে হাইড্রাণ্ট-উপচানো

গঙ্গার জল

ফোকলা পুরণতের মতো

কেবলি ভুল উচ্চারণে

বিড়বিড় বিড়বিড় ক'রে

সমানে পড়ে চলছে

তর্পণের মন্ত্র

ঠিক সেইখানে টিপ্ ক'রে

আমার দু-আঙুলের টুক্কিতে ছুঁড়ে-ফেলা

সুখটান-দেওয়া জ্বলন্ত সিগারেটের মুখে

ছাঁক-ক'রে-ওঠা

একটা হা-হতোস্মি

শব্দ

সারবন্দী ছাদের ফাঁকফোকরে

আঠা দিয়ে সাঁটা

লালনীল কাগজের টুকরোর মতো

গোধূলির আকাশ

রাস্তার এক নিরাশ্রয় মৃত্যুপথযাত্রীকে

ট্যাকে ক'রে

নির্মল-হৃদয়ে ছুটে-যাওয়া

গায়ে-মাছি-পিছলানো

সাদা রঙের

যীশু-তুমি পরম-দয়ালু

BANGLADARSHAN.COM

অ্যামুলাস
ভেতরে নজরবন্দী বাসনার
ওস্কানো আগুনে
বাঁপ দেবে ব'লে
শো-কেসের স্বচ্ছ কাঁচে
মাথা-খুঁড়ে মরা পতঙ্গের মতো
অগণিত চোখ
আধ-কপালে হওয়া পৃথিবীটাকে
একটা রমণীয় পরিণামের জন্য
মাথার ওপর
দাঁড় করিয়ে রেখে
পাতাল বরাবর
আমি নেমে চলেছি

এরপর আর কোথাও

ভূমিষ্ঠ হব ব'লে॥

BANGLADARSHAN.COM

পয়লা আষাঢ়ে

পানপাতাটা তোমার, বউ

এই হেতেরটা আমার।

তোমার সবই

আপ্গরজে আপনি হয়

আমারগুলোই

পিটিয়ে গড়ে কামার।

এই রঙটা তোমাকে টানে

এই রঙটা আমায়।

একটি তোমায় অবাধে ছোটায়

একটি আমায়

হাত দেখিয়ে থামায়।

গুচ্ছের ফুল দেখো, ও বউ

হাসছে তোমার খোঁপায়।

ফুলের মালা

কেবল আমার গলা জড়িয়ে

জানি না কেন কিসের জন্যে ফোঁপায়।

জানলা দাও, দরজা খোলো

কড়া নাড়ছে

বাইরে পয়লা আষাঢ়।

শুধু জ্বলুক একটি জোনাক

আমাদের এই

বাবুইপাখির বাসার॥

BANGLADARSHAN.COM

ঘরে না, বাইরে না

এক পক্ষে

তিন লক্ষ অক্ষৌহিণী

নারায়ণী সেনা—

প্রত্যেকে দুর্ধর্ষ যোদ্ধা

সংশপ্তক

ভয় কাকে বলে তা জানে না।

যে জন্যেই হোক

(এরাও কৃষ্ণেরই জীব!)

প্রাণ দেয় হেলায়।

দ্বারকায় ব'সে দুর্যোধন

চেটে নেয় জিভ—

আজ তার প্রাণে বড় সুখ।

অন্য পক্ষে

নিরস্ত্র একাকী

যুদ্ধপরাজুখ

শ্রীকৃষ্ণ স্বয়ং।

ভূভারতে একালে কেবা কী

তাকালেই বোঝা যাবে।

বোঝা যাবে অর্জুন কী চায়

কেন কে

নক্ষত্রলোকে

দাঁতমুখ সমানে খিঁচায়।

হেঁকে আজ বলুক সবাই:

মানুষ আমার ভাই!

বন্ধ করো ভ্রাতৃযুদ্ধ,

যেন কেউ মানুষ মারে না—

ঘরে না, বাইরে না॥

BANGLADARSHAN.COM

দোহাই

হিপিপ্ হুরে, হিপিপ্ হুরে,

ঘিসিং!

বেঁধেছেন জোট, খুলেছেন জট

ত্রি সিং!

পেছন থেকে ভুল আর

করবেন না খুল্লার।

দোহাই, নিজের কল্পরাজ্যে

ঘিসিং

যেন না হন মিসিং॥

BANGLADARSHAN.COM

শতকিয়া

চলে গেছে একশত বর্ষের
বহুপ্রার্থিত সেইদিন।
ফুরোয়নি কাজ—

এখনও এ নয়
হাত ধুয়ে ফেলে বিদায় নেবার
সময়।

যদিও কণ্ঠ ক্ষীণ,
দুপায়ে নেইকো আগের ক্ষিপ্র গতি,
স্মৃতি তবু দেয় উস্কে চোখের জ্যোতি

খড়ির গণ্ডি যতবার মোছে
মনের শিকল যতবার ঘোচে
ততবার তাকে কেটে ছোট ছোট করে
কোটরে কোটরে

ঘরের ক্ষমতালিপ্সু, এবং
বাইরের শত্রুরা।

রক্তের রঙ
ত্রিবর্ণে বেঁধে রাখী
জয় ক'রে নেবে হাতে হাত দিয়ে

শান্তি মৈত্রী মুক্তির সব
অভংলিহ চূড়া।

আকাশে আকাশে উড়ুক প্রাণের পাখি॥

চোখের মাথা খেয়ে

রয়েছি আমি চোখ বন্ধ ক'রে—

মুখের সামনে সকালবেলার কাগজ
দুহাত দিয়ে ধ'রে।

সব মুখস্থ, সবই আমার জানা।
স্বপ্ন নাকে খৎ দিচ্ছে,

ধুলোয় মুখ ঘষে

ছিন্ন-পাখা রক্ত-মাথা

কল্পনার ডানা।

গায়ে বসলে তাড়াই মাছি।

চোখ বন্ধ ক'রে

দু হাত দিয়ে আঁকড়ে ধ'রে আছি
বুকের কাছে সকালবেলার কাগজ।

ঘড়ির কাঁটায় ঘুরে যাচ্ছে রোজ

কবে কোথায়

কাগজে দেয় টিক

নাম সংখ্যা

সময় সন তারিখ।

চায়ের কাপে ধোঁয়া উঠছে

চোখের জল গড়ায়

শুধু এ পোড়া ঠোঁটে।

সব মুখস্থ, সবই আমার জানা।

ব'সে রয়েছি, চোখ বন্ধ

টের পাইনি আলাগা মুঠো খুলে

পায়ের কাছে লোটে

কখন কাগজখানা।

মাথার ওপর সমস্তক্ষণ

খাঁড়া রয়েছে বলে

মুখ লুকিয়ে মেঘে

খুনীরা আছে জেগে।

থেকেও চোখ কানা

কারণ, আমার সব মুখস্থ

সমস্তই জানা॥

BANGLADARSHAN.COM

সোজা নয়

চেনে বাঁধা থাকত কুকুল

চেন একবার খুললে

চোর বা সাধু যেই হোক সে

মাংস নিত খুবলে

যে ভাষাতেই করুক না সে

দিন রাত্তির ঘেউ ঘেউ

যার বোঝার সে ঠিকই বুঝত

ঘেঁষত নাকো কাছে কেউ

কেউ জানে কোন্ গোত্রের

কোথায় আদি নিবাস তার

বাড়ির গিন্গী ভাঙতে চান না

কুকুরটি তাঁর রাস্তার

কুকুরের নাম কুকুল হলেও

নামটাই যা রুশ

নইলে তার গায়ের রঙটা

এক্কেবারে আবলুশ

চোখ বুঁজল কুকুল যেদিন

গিন্গী-মার কোলে

ব'সে সবাই যার যা আছে

স্মৃতির ঝাঁপি খোলে

চোদ্দ বছর একসঙ্গে

ব্যাপারটা নয় সোজা

কে যে কাকে রেখেছিল

শক্ত হয় বোঝা॥

BANGLADARSHAN.COM

এক দুই তিন

এক তাল দুই তাল তিন তাল
সাম্লিয়ে সুম্লিয়ে!
পড়েছে যা দিনকাল

এক টুক দুই টুক তিন টুক
ভাগ করে পিঠে খায়
কালনেমি হিংসুক

এক ডাক দুই ডাক তিন ডাক
পরমাণু-ব্রহ্মের
তাক্ তাক্ ধিন্ তাক্

এক ডুব দুই ডুব তিন ডুব দিয়ে
যম দেখে কালসাপ
নেয় তার চোখ খুব্লিয়ে।

BANGLADARSHAN.COM

বদলাচ্ছে দিন

দুনিয়া ছিল কাল যেখানে

আজ আর—

সেখানে নেই।

বন্ধ স্রোতে ঢল নেমেছে

কূল-ছাপানো

বন্যার।

সামনেই

ভেসে যাচ্ছে রক্তে-জমাট

নিষ্ঠুরতার জ্বরদস্ত স্মৃতি।

খুলে যাচ্ছে দরজা জানলা

বন্ধ কপাট

সবার জন্যে শুভেচ্ছা-সম্প্রীতি।

মাটি-কাঁপছে, পায়ের নিচে

তোলপাড়।

রসাতলের হাঁ-মুখ থেকে

পিছিয়ে এলে বুঝিয়ে দেবে

সবার ওপর আজ সত্য

মনুষ্যত্ব।

নিজেকে খুব শেয়ানা ভেবে

উঁচিয়ে ধ'রে সঙ্গিন

অবিশ্বাসীর হাসি হাসছে

বেকুব।

বদলে যাচ্ছে দিন

জানে না সে, এক নদীতে দুবার

দেওয়া যায় না ডুব॥

BANGLADARSHAN.COM

আন্বা আখমাতোভা-কে

আলেকজান্দার ব্লক

হিস্পানী শাল ভালো ক'রে টেনে দিয়ে
কাঁধের দুপাশে, অলস উদাস চোখে
খোঁপায় গুঁজলে একটি রক্তগোলাপ
রূপে অনন্যা
দারুণ রূপসী বলবে তোমায় লোকে।

খ'সে পড়ে যাবে মেঝেতে রক্তগোলাপ
জড়োসড়ো হয়ে যখনই বাছার গায়
ঢেকে দেবে তুমি ফুল-তোলা সেই শাল
রূপে সাধারণ ব'লে ওরা দেবে রায়।

লোকে চারপাশে বলুক যার যা খুশি
ভাসা-ভাসা সব, যেটুকুও যায় কানে
নিজেই নিজের মনে আওড়াবে তুমি
ডুবে যেতে যেতে হঠাৎ গভীর ধ্যানে;

‘অনন্যা যদি নাও হই, নই সাধারণ
সে নাই পুঁছুক খুব যার কাছে কিছু নয়—
এটুকু বোঝার ক্ষমতা রয়েছে ঘটে;
এ জীবন জুড়ে থাকে যা, সে শুধু ভয়॥

BANGLADARSHAN.COM

আহা রে

বেড়াতে তিনি যেতেন নিত্য
কমলে বায়ু বাড়ত পিত্ত
ছিল না রুচি আহারে

মাথার চুল যতই শাসাক
এ বয়সেও পোশাক আশাক
পরতেন বেশ বাহারে

ক'দিন আগে সাজিয়ে কুঁজোয়
ফোটানো জল, বোঝেননি ঠিক
পেশিতে ব্যথা, না হাড়ে?

ফিরেই গেলেন রেসকোর্সে
চঁচালেন খুব ফুল ফোর্সে
ঘোড়াটি তাঁর না হারে
কখন যে হয় কার কী ফন্দী
কাঁচের গাড়ির খাঁচায় বন্দী
তিনিই নাকি? আহা রে!

BANGLADARSHAN.COM

মজা দেখ

পুতিগন্ধ ঢেকে দিচ্ছে ধূপ
সমস্ত ধোঁয়ায় ধোঁয়াকার
হয় যাতে। ভয়ে সব চূপ।

রাজায় রাজায় যুদ্ধ। কার
হাতে আছে রঙের তুরূপ?
দু পক্ষেই তা নিয়ে হুঙ্কার।

যৌবনকে ছেকে ধরছে জরা,
চাহিদার একমাত্র যোগান
জনপদে ভোটের পসরা।

সততার ভেক ধরে ভান।

দাঁড় করিয়ে পুতুল মুখরা
দুশমন ছুরিতে দেয় শান।

মজা লোটে বান আর খরা ॥

BANGLADARSHAN.COM

রাজভিখারী

ধুনোর গন্ধে ঢেকে চারিধার
জাল বুনে মায়াকুহকে
ধূপের ধোঁয়ায় ধোঁয়াকার ক'রে
লাগায় ধন্ধ দুচোখে।

হাটে মাঠে রটে মোসাহেবদের
সভায় খেউড়খিস্তি
সাধু সেজে রাজাসাহেব স্বয়ং
বড়ে ঠেলে হাঁকে কিস্তি।

নামাবলী গায়ে দিয়ে মন্দিরে
ঘণ্টা নাড়েন পূজারী
নায়েবমুনশী খাসতালুকের
খিঁচে নেয় মালঞ্জারী।
সমানে ডান-বাঁ কলকাঠি নাড়া
চলেছে সব্যসাচীর
কামানের মুখে মাটি টলমল
ভাঙছে দুর্গপ্রাচীর।

মহুরাদের কুমন্ত্রণায়
ভেকধারী রাজভিখারী
আগাছার জঙ্গল মাথা তোলে
মুখ টিপে হাসে শিকারী ॥

BANGLADARSHAN.COM

বগাফোঁস

দাঁত নড়ছে, কোমর ভাঙা,
চোখে পড়েছে ছানি
মর্চে-ধরা অস্ত্রে আজ
হালে পায় না পানি

অন্ধকারে ছুঁড়েছে টিল
হাতে ভাঙছে হাঁড়ি
খাচ্ছে টোপ, গিলছে কই?
সমস্যাটা ভারী—

চাকে জমেছে মধু
ঢাকে পড়েছে কাঠি
দেখ জাদু, ভানুমতীর
কেমন ধোঁকার টাটি
নন্দঘোষের শক্ত ঘাড়ে
চাপিয়ে সব দোষ
বুড়োখাড়িরা ক'রে চলেছে
সমানে বগাফোঁস ॥

BANGLADARSHAN.COM

এসো হে

আমাকে চিনবে না।
অনেকটা রাস্তা উজিয়ে
আজ এই পড়ন্ত বেলায়
আমি আসছি।

মাথাভর্তি মাঠ ভাঙা ধুলো,
দুটো পা-য়
কাঁটায় কাটাছেঁড়ার দাগ।

বলি, চেনা লোকেরা সব
গেল কোথায় গা?

গোধূলির শূন্য দাওয়ায়
এমন কেউ নেই
যে তার মুখ ঘোমটায় ঢেকে
পিড়ি পেতে দেয়,
কনুই ছুঁয়ে এগিয়ে দেয়
এক ঘটি তৃষ্ণার জল।

উঠোনে খেলে বেড়ায়
একা একা
হাতের লাঠির ঠক ঠক
আর গাছের পাতার
টুপটাপ শব্দ।

কই, এসো হে—

ঘরে-ফেরা পাখির কলরবে,
দূরগত শাঁখের আওয়াজে
দিনাবসানের আজানে

BANGLADARSHAN.COM

আমার সেই ডাক
আর কাউকে না পেয়ে
মাথা নিচু ক'রে
আবার আমার কাছেই ফিরে আসে॥

BANGLADARSHAN.COM

ভগ্নদূত

আমি চোখ বন্ধ করে আছি

মুঠো-করা দুটো হাতের মাঝখানে

সামনে

হাট ক'রে খোলা

কালি মেখে

মুখ চুন ক'রে থাকা

ভগ্নদূতের মতো

আজকের কাগজ

আমি চোখ বন্ধ ক'রে আছি

একবারও না তাকিয়ে

পাখি-পড়ার মতো ক'রে

আমি ব'লে যেতে পারি

কে কী কেন কোথায় কেমন ক'রে

পাতায় পাতায় হেঁটে চলেছে

কারো গর্দান নেবে ব'লে

শকুনের মুখে হাসি ফুটিয়ে

নতুন কার

লাশ পড়বে ভাগাড়ে

আমি চোখ বন্ধ ক'রে আছি

যখন ভগ্নদূতকে আড়াল ক'রে

সামনে এসে দাঁড়াবে

রুদ্রের দক্ষিণ মুখ

সজোরে

চোখের পাতা খুলে

শুধু তথাই আমি তাকাব ॥

BANGLADARSHAN.COM

ঘরের বাইরে, বাইরের ঘরে

ঘরের বাইরে, বাইরের ঘরে

শিশিরে শ্রাবণে

জলবৃষ্টিতে তুফানে ও ঝড়ে

সভায় বা নির্জনে

স্বচ্ছন্দে যে নিজের জন্যে পারে

ঘর বেঁধে নিতে

বটের ঝুরিতে

আলোয় অন্ধকারে

পাভুপাদপে

ভ'রে যাবে মরুভূমি

ফল্গুধারায় আপনাকে দেবে সঁপে

তার কাছে মৌসুমী॥

BANGLADARSHAN.COM

দে-দোল

অবনী আছে? অবনী আছে? অবনী?

অবনী আছে?

অবনী নেই?

অবনী?

চুনবালির মুকবধির দেয়াল ছেড়ে

নিরন্তর ধ্বনি

স্থলিত পায়ে টলতে টলতে ফেরে

স্মৃতিবিধুর পাষাণভাঙা পথে

নিঃশব্দে নিঃসঙ্গ একা

বিফল মনোরথে

চেয়ারগুলো টেবিলে-তোলা

মেঝের ওপর ছেঁড়া কাগজ

দরজা খোলা

চায়ের দোকান ফাঁকা

ঘরের কোণে দাঁড় করানো নিশান

আঠার-ভাঁড় কালির-কৌটো চাটাই

দেশলাইয়ের খোল

সিগারেটের ছাই

স্মৃতিকে দেয় দে-দোল

আগুন সাক্ষী

শূন্য পকেট

জীবনকে দেয় ভেট

কখনও বনে কখনও যৌবনে

কখনও রণে কখনও বা মরণে

মলাট ছেঁড়া বইয়ের পোকাগুলো

ধুলোমুঠিকে করেছে সোনা

সোনামুঠিকে ধুলো

আজ তো সব গাছের থেকে পড়া

কোঁচড়ে ভরা

শুধুই পাওয়া এবং শুধু নেওয়া

সবুরে ফলে মেওয়া

চোখে যাদের দেখেছিলাম

আলাদিনের আলো

দীনদরিদ্র বন্ধুরা সব

অখ্যাত নাম

তারা কোথায় গেল?

বুকের মধ্যে ছিল যাদের ভালোবাসার খনি?

অবনী আছে? অবনী আছে? অবনী?

অবনী আছে?

অবনী নেই?

অবনী?

BANGLADARSHAN.COM

সপ্তাহ প্রতিদিনই

শিব নেই। ছি! ছি!

সেই দুঃখে

দক্ষযজ্ঞে

যাননি দধীচি।

ব্রাসুর হানা দিলে

স্বর্গচ্যুত

হল দেবতারা—

খোদ ইন্দ্র রণে ভঙ্গ দেন।

তখন দধীচি ছাড়া

দেবগণ

অনন্য উপায়।

দধীচি দিলেন প্রাণ

তবে দেবতারা পায়

তঁার অস্ত্র থেকে

ব্রহ্মনিধনের বজ্র—

যাঁর জন্ম

একদা শান্তির গর্ভে

অথর্ব মুনির ঔরসে

এবং প্রেমের গর্বে

সারস্বত পুত্রের পিতা যিনি।

বিনা নামে বিনা অর্থে

বিনা যশে

সে বজ্র বানিয়ে যায়

নিজের অস্ত্রিতে

BANGLADARSHAN.COM

নেপথ্যে

সপ্তাহ

প্রতিদিনই॥

BANGLADARSHAN.COM

অনেকের গান

১

দেখ, দেখ দিন বদলায়—
ও আমার দেশের ভাই,
পুব আকাশে রং ধরেছে
আলো আসে, আঁধার যায়।

চোখ মেলো,
ও শহীদের মা,
ও বাছা, ও প্রিয়তমা।
যে খুনী সে পায় না ক্ষমা
রক্তের ধার আছে জমা
লক্ষ হাত আজ নখে ধার দেয়।
দেখো, দেখো...

স্বাধীনতার স্বপ্ন ছিল গানে গানে গল্পে গাথায়
ফোটে আজ কী বিচিত্র রঙ ফুলে ফলে পাতায় পাতায়
জাগো, জাগো, দেখ মা গো
কলের মজুর ক্ষেতের কিষণ
শিকল ভাঙে, ওড়ায় নিশান
জগৎ জুড়ে নতুন বিধান
কোটি কণ্ঠে জীবনের গান গায়।
দেখ, দেখ...

২

কাজে কথায় সমান হ' ভাই
ডাক দিয়েছে গুরুর গুরু
লম্বা চওড়া বলিস কী ছাই
কর এখনই যজ্ঞ শুরু।
গর্জে শুধু, বর্ষে না যে
লাগে না সে কোনো কাজে
যাত্রাতেই বা ভীমের সাজে

ভাঙে দুর্ঘোষনের উরু।

ডাক দিয়েছে...

মুক্তধারায় বাঁধ দিলে তো বিজলি পাবে

লাগাম ছাড়ো, অশ্বমেধের ঘোড়া যাবে।

যেখানে হয় সবাই সমান

সবার জন্যে সকলের টান

সেখানে হাত আপনি বাড়ান

আল্লা হরি মারাংবুরু।

ডাক দিয়েছে...

BANGLADARSHAN.COM

হে তরঙ্গরাশি! সুপ্রভাত

পারভেজ শহীদী

অসহায়তার কোলে মাথা গুঁজে নিদ্রিত ছিল মহাচীন।

বসন্ত শ্বাসরুদ্ধ সেদিন ধ্বংসের নাগপাশে

বাগানে বাগানে ফুলের সুরভি হা-হতাশ ক'রে ফেরে

নিঃশব্দের বুকের পাঁজরে গুম্বরিয়া মরে গান

সকালের মুখ ঢাকা পড়ে অমানিশার অন্ধকারে।

শুধু ইয়াংসি নদীতে সেদিন

উঠেছিল জ'মে উত্তাল এক জোয়ার;

সে জোয়ার ক্রমে

মাও সে-তুঙের বিপ্লবে নিল রূপ

বহু স্রোত এসে মিশে গেল এক অপরূপ কল্লোলে।

২

ইয়াংসি নদীতরঙ্গ হ'ল ভল্গার হাতে বীণা

উছল সেই জলকলতান মিলে গেল মহাকালের মুখর গানে

ইয়াংসির সেই জলকল্লোলে ধূলিধূসরিত স্বপ্ন ছড়াল পাখা

ইয়াংসির সে আরক্ত ঢেউয়ে নির্ভীক নিঃসঙ্কোচ সুর বাজে

জীবননৃত্য ইয়াংসির সে ঘূর্ণীতে ফেলে ছায়া

যার যা প্রশ্ন, নদীতরঙ্গে তার যথাযথ উত্তর পাওয়া গেল।

আজ ইয়াংসি নদীতে এ-যুগ দৃষ্টি বদল করে

ট্রুম্যানের দেওয়া চিয়াঙের ডিঙি ডুবে গেছে এরি জলে।

৩

ট্রুম্যানের দেওয়া চিয়াঙের ডিঙি ডুবে গেল, ডুবে গেল,

ট্রুম্যানি দোস্তি হালে পেল নাকো পানি

অত্যাচারীর সমাজকে আজ মৃত্যুই তার গঞ্জুষে পাণ করে

মাথা নুয়ে পড়া জনতা গর্বে বুক টান ক'রে দাঁড়ায়

হিংস্র শাদা ঝটিকারা যত সাজসজ্জাই করুক

হাজার অস্ত্র হাতে ওৎ পেতে দাঁড়াক না বোস্বেটে

জনতার ডিঙি থামেনি, চলেছে আগে—

ক্ষুর দাঁড়ের টানে টানে তার যত আবর্ত বুদ্ধ হয়ে গতিপথে গেছে মিশে।

৪

বাম্-বাম্-বাম্ ডলার আহা, বান্-বান্-বান্ অস্ত্রের বাড়বাধুণা!
সোনাচাঁদির ষড়যন্ত্র! কল্জে-ছেঁড়া প্রাণ-উচাটন মন্ত্র!
চোখ রাঙানি, রোয়াব কিবা! ধমক, লক্ষ্য বাক্ষ্য
পাঁয়তারা আর কেরামতি! বাঘা-মারা টিপ হয় রে!

আজও প্রত্যেকটি ঠোঁটে, আজও নিঃশ্বাসে নিঃশ্বাসে
জেগে আছে শুকনো ক্ষত।
রক্তে আর কাদায় গড়াগড়ি দিয়ে উঠে দাঁড়াল
সবুজ, উদ্ভিন্ন যৌবন
উষ্ণ রক্তে ডুব দিয়ে উঠে উদ্দীপিত হ'ল জীবন।

৫

জিম্ ক্রেন-র সব চালই বেচাল
মাঠে মারা গেল জন্ বুলের জারিজুরি
শ্বেতাজ পেটমোটাদের চাঁদিপেটানো ধ্বংসের কারবার
টিক্‌ল না আর চীনের মাটিতে।
জনতাকে সামনে দেখে ভয়ে ঠক্ ঠক্ ক'রে কাঁপতে লাগল
চিয়াঙের বর্বরতা।
বজ্রগর্ভ মেঘের মত সারা দেশে ছড়িয়ে পড়ল শ্রম
শত্রুর হাঁকডাক আঘাতে গল্প হয়ে মিলিয়ে গেল
কেননা মৃত্যুই যোগায় জীবনের হাতে অস্ত্র।

৬

সারা চীন আজ নবজীবনের সুরলোক
যৌবনমণ্ডিত শ্রমের মহিমাম্বিত লীলাক্ষেত্র
স্বফীত, উৎক্ষিপ্ত সেখানে প্রত্যেকটি তাজা বুক
কুতূহলী প্রত্যেকটি চোখ, ভালোবাসায় ভরা প্রত্যেকটি হৃদয়
যেখানেই তাকাও দেখবে আরক্তিম আভা
যেখানেই যাও বসন্ত।
কোটি কোটি পোড়-খাওয়া হৃদয়ের স্পন্দনে জেগে উঠছে সুর
ধানজমি আর বিশাল সরোবর

ভরে উঠছে সোহাগে।

৭

নাচ আর গানের যে জগৎ, তার মাঝখান দিয়ে গেছে জীবনের পথ
নতুন সাজঘরে সাজাচ্ছে নিজেকে জীবন
সবুজ ফসলের মাঠে মাঠে অঙ্কুরিত জীবন
নতুন সকালের লাল আভায় উদ্ভাসিত, আরক্তিম জীবন
আনন্দ দিয়ে ভ'রে নিচ্ছে তার আঁচল।
চোখে তার ধনুর্বাণ, নিঃশ্বাসে দড়ির ফাঁস
মৃত্যুকেও আজ সে মৃগয়া করে।
লোকপ্রিয় সরকার আজ আশার আনন্দধাম।

৮

নববধূ শান্তির হাতের লাল কাঁকনের রিগি রিগি শব্দ শোনো
বাজুবন্ধে তার মুখরিত লাবণ্যগাথা
কামনার উদ্যান ভুর ভুর করছে তার মিষ্টি গন্ধে
সিঁথিতে পুজোয় বসেছে ছায়াপথ।
আকাজ্জা তার একাগ্র আর যৌবনোদীপ্ত অভিলাষ
অসঙ্কেচ চিরবসন্ত তার শোভা
জিম্ ক্রেন-র চক্রান্তে বিহ্বল হবে না সে
শান্তির সিঁথির সিঁদুর অক্ষয় রাখবে
ভার নিয়েছে জনসাধারণ।

৯

বদলে যাচ্ছে এশিয়ার শোকাবহ অবস্থা
বলিষ্ঠ আকাজ্জা দিয়ে এশিয়া ক্ষালন করছে তার পাপ
সেনাদলে নাম লিখছে তার নতুন উদ্যম
প্রাণোচ্ছল হাসি হয়ে ফুটে উঠছে তার দীর্ঘশ্বাস
এশিয়ার মাটিতে টলোমল সিংহাসন সাম্রাজ্যবাদের
চীনের রাস্তা দেখতে দেখতে গোটা মহাদেশেরই রাস্তা হয়ে উঠল।
যদিও পথে পদে পদে আছে বিপজ্জনক বাঁক
তবু বিপ্লবই শান্তিরক্ষার উপায়।

এই জরাজীর্ণ সমাজকে জাহান্নমে পাঠাবে যৌবন
 প'চে-যাওয়া প্রাচীনত্বের ঠাই হবে না এশিয়ায়
 বিতাড়িত অন্ধকার সাহস পাবে না ফিরে আসতে
 নতুন সকালের মাধুর্যে শীমণ্ডিত হবে নতুন বাগান
 নতুন বসন্তের সুরে সুর মেলাবে বাতাস
 গেয়ে যাবে, তারা গেয়ে যাবে আর সমস্ত চরাচর ঝঙ্কত হবে সেই গানে
 চেতনা আরক্ত আজ, চোখ মদির আজ
 পদচিহ্নের লাল আলোয় আরক্তিম আজ সারা পথ।

অতীত বিদ্রোহের ঐতিহ্য আজও তাজা
 স্মৃতির মধ্যে আজও তাজা আমাদের বলিষ্ঠ আশা
 সে সব নাম, সে সব ইতিবৃত্ত আজও আমাদের জাগায়
 যৌবনের রক্তে লেখা সেই ইতিহাস আজও মৃত্যুহীন
 যৌবনোদ্দীপ্ত আমাদের বুদ্ধি, যৌবনোদ্দীপ্ত আমাদের হৃদয়
 আর যৌবনোদ্দীপ্ত আমাদের শ্রম
 শিরায় শিরায় উষ্ণ রক্তের ঢেউ তুলে
 জনতা দৃপ্ত পদক্ষেপে এগিয়ে যাবে।

সেই একই যাত্রায় চলেছি আমরা, সেই একই মিছিলে
 ছদ্মবেশ আলাদা হলেও এখানেও সেই একই স্বর্ণ-লোভাতুরের দল
 ঘৃণ্য সাম্রাজ্যবাদের চিহ্নফলক এখানেও পাওয়া যাবে
 আমাদের ঢেকে আছে একই দুঃখের রজনী
 একই সূর্যোদয়ের কামনা আমাদের বুকে
 এখানেও প্রত্যেকটি চোখ একই লক্ষ্যসন্ধান ফেরে
 চীনের পদাঙ্ক যেন বিপ্লবের রক্তশতদল
 যৌবনের সমস্ত উন্মুক্ত পথই আজ সুরভিত।

নতুন যুগকে আমি দীপান্বিত করব আমার লেখায়
 কাব্য আর গানের জগৎ আনন্দে ভ'রে তুলব আমি

যুদ্ধের অগ্নিশিখার হাত থেকে বাঁচাব আমি জীবনের হাসি
পৃথিবীর পায়ের নিচে নুইয়ে দেব আমি আকাশের মাথা
আমি গঙ্গার তরঙ্গবীণার তালে তাল দিয়ে রক্তিম সূর্যোদয়ের গান গাইব
ইয়াংসির হে আমার প্রিয়তম তরঙ্গরাশি!
তোমাদের বাণী আমার কাছে পৌঁছে গেছে।
সুপ্রভাত, সুপ্রভাত হে তরঙ্গরাশি! হে তরঙ্গরাশি-সুপ্রভাত!

(উর্দু থেকে অনুবাদ)

BANGLADARSHAN.COM

॥সমাপ্ত॥